

MUCHANAN riba e bon caminda...

SHARDEA GROES - Softball

Shardea tin 12 aña y ta un mucha hopi cariñoso y sigur di su mes. E tin su futuro practicamente clá planea. Pero mientrastanto e ta probecha lo maximo di su hubentud. E gusta sali keiro, hunga tennis, softball, y otro deporte, bai misa, canta y balia, y tambe juda su mama cu algun trabao chikito.

Cu su 8 aña ya caba e ta practicá e deporte di softball. E ta train tres biaha pa siman pa e team di Smashers. E ta gusta su coachnan Mientje y Lindies Romano cu ta stimulá nan y encurashá nan pa ta e mihornan. Su picheo e ta train casi tur dia na scol cu su tanta Marina Haynes.

Shardea tin un averahe di 500 di bateo, hopi bon, y e posicionnan cu e ta hunga ta varia, e ta bon den tur! Pesey tambe e tin asina hopi triunfo tras di su number, p.e. Pitching Champ 2000 y Home-run Champ 2000, y sin mencioná e triunfonan di su team, cu casi tur aña ta sali sea campeón of sub-campeon. Tambe e cu su team a hunga algun biaha na Puerto Rico.

Shardea su mihor hugada tabata un biaha, como shortstop, a tira un bala "home" y a "out" e hungador. Y cu esaki a gana e wegá.

Su fansnan mas grandi ta su mama y tata, cu tambe ta deportistanan di antes, pasobra su mama mes tambe a hunga softball, y su tata a hunga futbol. Su ruman tambe ta un deportista, como cu e ta hunga baseball y basketball. Pero no ta mama, tata, y ruman so ta fans, su mesun amiganan tambe!

Ora di huiswerk pisá of di un proefwerk, Shardea ta preferá di keda cas. Ya asina e ta prepará su mes mihor pa estudio, cual ta hopi importante p'e.


Cu 5 aña Shardea ta bezig cu dos otro actividad tambe, canta y balia. E ta canta den e koor di misa y tambe den Beautiful Voices, y ta bon pa mencioná cu e ta participando tambe den Voz-i-landia e aña aki.

Su grupo di baile ta Young Stars of tambe conoci como Grupo C, cu sa balia varios biaha na festivalnan di YMCA y San Nicolas Uní. Por ultimo, Shardea tin un mensahe pa tur mucha: "Sigui haci deporte, no haci droga, y studia bon pa logra locual bo kier den futuro".

Exito Shardea, den Voz-i-landia y den bo futuro carera!



Shardea tin su trofeonan, medayanan y certificadonan wardá den un cashi den su sala, unda tur por admirá nan.



RANDOLPH ODUBER - Baseball

Un mucha cu ta orguyoso di su triunfonan, masha amistoso, esey ta Randolph. E tambe tin 12 aña, y a cuminsa hunga baseball, su deporte favorito, cu 5 aña!

E ta train duro 2 biaha pa siman hunto cu su team di Caribe Indians, y su coach Amador Oduber. E gusta su coach, e tin hopi disciplina, y esey ta bon ora bo kier jega leu. E team cu Randolph ta hunga aden ta asina bon, cu ya 5 aña consecutivo cu nan ta clasificá. Nan a bai hunga afó tambe pa campeonato Latino America. Por mira riba e potret na banda Randolph den accion, y cu hopi concentracion den e campeonato aki.

Pero Randolph su so tambe tin triunfo, un di nan ta cu el a sali Most Valuable Player di 2000, y su mihor hugada tabata un Grand Slam.

Su fansnan mas grandi ta su famia, principalmente su tata. Tur wegá mama y tata ta bai. Y ora cu por su ruman tambe. Randolph tambe ta bini di un famia deportista, ya cu su mama tabata hunga volley, su tata futbol, y ruman softball.

Na scol Randolph ta bay hopi bon. Su rapport a bin bunita. Mescos cu Shardea, Randolph tambe ta kies pa keda studia na cas si tin proefwerk e dia siguiente na scol, enbez di bai train. Su estudio ta keda na prome lugar. Den su oranan liber, Randolph, mescos cu tur otro mucha, gusta corre bicicleta, hunga nintendo, y haci les. Pero tambe hunga baseball y futbol, y si e mester di extra cen, e ta bai traha p'e.

Randolph tin un mensahe pa tur mucha: "Tende fey coach, cu disciplina bo ta jega leu. Pero semper e estudio mester ta na prome lugar".

Randolph, hopi exito den futuro. Sigui asina!



Randolph tambe ta orguyoso di su trofeonan, medayanan y certificadonan, y ta wardanan bunita riba rekkinan unda bista ta cay mesora riba nan.



CHABALITO ta gradici Sr. A. "Bolle" de Cuba, Sr. Priam, y mayornan di Shardea y Randolph pa e cooperacion cu a ser duná na nos pa haci e entrevistanan aki posibel.



Chabalito

Number 8 - Año III - April, 2001 - Afl. 2,=



Bo kier sa kiko ta De Bezetting? • Gana Premio! • Conoce e historia di Postkantoor!